

松

陵

文

獻

松陵文獻

獻集卷二

邑人潘樛章力田撰

人物志二

宋

謝濤

子絳

謝濤字濟之其先居富春父崇禮爲中吳軍節度推官因家焉濤幼奇敏年十四講左氏春秋會劉繼元平守臣當上賀命吳中文士作表章更數人皆不愜意濤私自草之吳士見者大驚常讀書陽山澄照寺

知吳縣羅處約知長洲王禹偁皆與定交曰濟之吾
曹敵也淳化三年進士起家爲梓州權鹽院判官李
順反成都濤畫策守禦以功遷觀察推官權益州華
陽縣時亂後田廬荒廢有詔能占田而倍入租者予
之於是腴田悉爲豪右所據流民無所歸濤收詔書
悉以田還主改著作佐郎通判壽州知興國軍真宗
卽位銳意人物內出朝士有治跡者二十四人名付
門下省濤與焉召對長春殿會京東盜起命以屯田
員外郎知曹州斬大猾趙諫於市曹人相賀尋命安

撫益利兩路旣還舉所部官三十餘人宰相疑其多
濤曰有罪願連坐於是奉使者舉官連坐自濤始上
用馮拯薦復召試以尚書兵部員外郎直史館尋兼
御史知雜事真宗山陵靈駕所經道路有司請悉壞
城門廬舍以過車輿象物濤言先帝車駕封祀儀物
大備不聞有所毀撤且遺詔從儉薄今有司治明器
侈大以勞州縣非先帝意願下少府裁損之屢以疾
求分司明道元年拜太子賓客卒年七十四子絳字
希溪十歲能屬文十五以父任試秘書省校書郎舉

進士甲科授太常寺奉禮郎知汝陰縣遷光祿寺丞
上書論四民失業累數千言以楊億薦召試擢秘閣
校理仁宗初遷太常博士用鄭氏經唐故事議宣祖
非受命祖不宜配享感生帝請以真宗配議格不行
天聖中天下水旱蝗起河決滑州絳上書引洪範京
房傳推災異爲天譴告之意極陳闕失無所諱仁宗
嘉納與修真宗國史遷祠部員外郎時濤官西京年
老因求便養通判河南府請闢內館以恢景德之制
又上書論妖人方士不宜出入禁中請追所賜先生

處士號時莊獻明肅太后莊懿太后起二陵於永安
一切鐵石畚鍤之需皆不取於民而足歲滿權開封
府判官言蝗亘田野乃吏不稱職所致願除煩苛之
命損聚斂之役郭皇后廢絳陳詩白華引申氏褒姒
爲諷詞甚切至徙三司度支判官初詔禁用織密花
透背云自掖庭始旣而賜內人衣復取於有司又後
苑制玳瑁器索龜筒於市龜筒禁物非民間所有絳
皆論罷之又請罷內降凡詔令皆繇中書樞密然後
行遷兵部員外郎以父憂去服除擢知制誥判吏部

流內銓吏部擬官舊視職田有無不問多寡以是不
均絳爲覈實差等其有名無實者皆不用人以爲便
寶元中使契丹還請知鄧州爲政寬厚務敦教化議
復召信臣六門堰以溉民田功未就而卒年四十六
絳以文學知名措辭適雅有元白風歐陽修尤所稱
許爲人修潔醞藉常請於郡立學所至大興黌舍在
河南修國子學教諸生遠近大集登第者十七人聞
絳卒皆出涕繪像於學而祀之絳好施宗族喜賓客
其歿也家無餘貲有文集五十卷子景初景平景回

俱見文學傳

潘子曰吳郡志但言濤自富陽遷蘇盧王二志因之不詳其居何邑也及考徐師曾科第表首列淳化三年進士謝濤官太子賓客乃知邑中前此無得雋者至濤始以楚材晉用爲多士先驅吾安得不急著之以彰篳路藍縷之功哉舊志於濤父子服官建白間有未核茲特采史傳及歐陽子文集稍爲更定又考舊志絳卒立祠於百花洲蓋謝氏自絳以下再遷蘇城遂爲郡人矣

魏憲

魏憲字令則紹聖四年進士與弟志俱有聲太學號熙豐人才憲累遷國子司業親喪三年不御酒肉廬於墓側有芝草甘露之祥再爲司業以學行見推尋兼太子舍人遷中書舍人給事中其文溫厚雅正得代言體宣和二年以直龍圖閣知常州三年除太常少卿歷顯謨閣學士知明州建炎二年爲吏部侍郎時車駕南遷案牘散佚吏緣爲奸有僞名寄貫之弊憲請嚴保任以覈實開告賞以止姦急期會以取閱

又言古未有背天險以爲都者敵騎由京西不四五日可至淮泗宜有以待之久之以直學士左太中大夫提舉江州太平觀進吳郡開國侯致仕歸名所居曰止菴學者稱爲止菴先生年七十三無疾而卒今列鄉賢祠第志元祐六年進士賁政和七年進士志四世孫汝賢淳祐四年特奏名狀元

王份

王份字文儒少力學工詩文隆興中以特恩補大治令律身清謹政尚寬恕修學校置田養士遇有疑獄

卽露禱於天以祈神助縣產鐵舊有鐵務病民份奏
減其額民德之繪像祀焉在縣七年一日登西塞山
誦張志和漁父詞慨然嘆息卽日致仕歸作室於雪
灘之上枕江水爲圃故有柳塘花嶼景物秀野自號
臞菴居士士大夫題詠甚多故名臞菴詩集後三十
年陸遊過吳江感其竹樹茂密風流猶存語見入蜀
記中先是紹興間知縣石公轍改建學校以地隘爲
言份時未仕卽割其居址之東偏以獻公轍嘉之比
諸范文正公至乾道三年知縣趙伯虛改建三高祠

份又割其居址之西偏以獻寶祐三年知縣曹良朋復新其祠份孫栗再割地以廣之成先志也今列鄉賢祠

范成大

趙礪老附

范成大字至能

宋史云吳郡人按宋初置平江府改蘇州後復爲平江無吳郡之名史但

因成大所自署者稱之不能定其爲何縣人也而郡志以其所居石湖在吳縣境直以爲吳縣人吳江志亦列之寓賢今考石湖界吳縣吳江二邑之間其生平篇詠在松陵者尤多則成大又當爲吳江人矣

父雱字伯達秘書郎成大年十二徧讀經史十四能文詞父亡讀書崑山薦嚴寺十年不出紹興二十四

年舉進士授戶曹監和劑局隆興初纂類高宗朝政
除樞密院編修官遷正字乾道初校書郎編修國史
歷著作郎吏部郎官言者論其超躐罷奉祠起知處
州入對首陳虛文之害帝嘉納至州創義役隨戶富
貧輸金置田助受役者詔頒其法於諸路處多山田
爲修梁時通濟堰壘石築防置隄閘四十九所立水
則三等溉灌有序重刻堰規於石民賴其利除禮部
員外郎兼崇政殿說書隆興再議和失定受書之禮
帝嘗悔之遷成大起居郎假資政殿大學士克金祈

請國信使國書專求陵寢蓋汎使也帝臨遣之曰卿氣宇不羣朕親加選擇聞外議洵洵官屬皆憚行成大對曰無故遣汎使近於求釁不執則僂臣已立後仍區處家事爲不還計心甚安之帝愀然曰朕不敗盟發兵何至害卿成大乞并載受書事不從金廷使者慕其名至求巾幘効之成大知其法嚴附請決不可達秘不語二使遂不復疑至燕山夜蔽帷秉燭草奏懷之具言他日北使至欲令親王受書旣入進國書詞氣慷慨金人方傾聽成大忽奏兩朝旣爲叔姪

而受書禮未稱臣有奏摺笏出之金主大駭顧諄宣
徽副使韓綱曰有請當語館伴此豈獻書處耶厲聲
令綽起者三成大不爲動曰奏不達歸必死寧死於
此時金廷紛然太子欲殺成大其兄越王止之旣還
館金主遣伴使取奏綱語成大曰公殿上之爭主上
嘉歎可以激勸兩朝臣子十月使還金人報書有抑
聞附請之辭欲變受書之禮出於不意要以必從之
語帝由是知其忠勁有大用意除中書舍人帝用知
閣門事樞密都承旨張說爲簽書成大畱詞頭七日

不下因請對徐出制草納榻前帝色變成大委曲陳
譬說命竟寢尋以集賢殿修撰知靜江府廣西兵食
專仰鹽利漕臣盡取之於是屬邑有增價抑配之弊
詔復行鈔鹽漕司拘鈔錢均給所部而錢不時至成
大上疏謂能裁漕司強取之數以寬郡縣則科抑可
禁從之數年廣州鹽商上書乞復令客販成大出錢
助之人多以爲非下所司議卒不能易又禁部內暴
露遺骸籍僧道舍棺無主者葬之尋除敷文閣待制
四川制置使知成都疏言土蕃青羗兩犯黎州而奴

兒結番列等尤桀黠輕中國臣當較閱將士外修堡
砦仍講明團結之法使人自爲戰三者非財不可詔
賜度牒錢四十萬成大以西南諸邊黎爲要地增戰
兵五千奏置都鹽路分土蕃入寇之路十有八悉築
柵分戍奴兒結擾安靜砦發飛山軍千人赴之料其
三日必遁已果然白水砦將王文才私娶蠻女導之
入寇成大重賞檄羣蠻使相疑貳俄禽文才以獻斬
之蜀士孫松壽樊漢廣皆挂冠不仕成大表其節詔
徵之皆不起凡人才可用者悉致幕下用所長不拘

小節其傑然者露章薦之由是遠近歸心進敷文閣
學士入對除權吏部尚書淳熙五年遷中大夫叅知
政事兩月爲言者所論奉祠歸起知明州奏罷海物
之獻除端明殿學士尋擢江東安撫使知建康府歲
旱奏移軍儲米二十萬以賑飢民減租五萬以病乞
休進資政殿學士起知福州封吳郡開國侯再領洞
霄宮紹熙三年加大學士知太平州尋乞歸封吳國
公明年卒追封崇國公謚文穆成大天資俊朗輔以
博學爲文瞻麗清逸自成一家尤工於詩自號石湖

居士有石湖集使北有子轡錄在廣有驂鸞錄虞衡
志出蜀有吳船錄家居時與郡士龔頤周南勝成采
緝故事爲吳郡志五十卷時與成大同使金顯名者
有趙磻老

趙磻老字渭師其先東平人門下侍郎野之姪也徙
家邑之黎里鎮以婦翁歐陽懋待制澤入仕孝宗朝
爲書狀官隨范成大使金成大歸薦之虞丞相允文
亦以爲才擢正言乾道八年以右通直郎知楚州俄
入爲大理寺丞淳熙三年由兩浙轉運副使知臨安

府四年除秘閣修撰五年權工部侍郎文獻通考云
礪老知臨安坐殿司招兵事謫饒州有拙菴雜著三
十卷外集四卷

莫大猷

子子文

莫大猷字廷嘉綺川人其先世居湖州號月河莫氏
有名濛者以工部侍郎使金不屈見一統志大猷紹
聖中以薦仕至浙東常平司提幹累贈朝請大夫子

子文

石湖志云子文父寧贈朝
請郎疑大猷別名寧耳

莫子文字仲武少敏悟通九經諸史寶慶二年舉進

士出知嘉興縣滿考候代會王疇奉使括田法甚苛
細子文不從疇譖之田使劾其拒命理宗素知子文
止降宣義郎制詞云勤撫字拙催科賢者之常也爾
爲令切切愛民乃不能汲汲赴功坐是爲使所劾降
爾一秩非朕得已然亦因是以知爾之爲人仁矣田
使見之怒奪不與後五年始復其官制詞又曰君子
之仕利鈍亦何常之有彼迎合希進之儔乃欲常利
而無鈍然至於時論卒亦不能有其有也可嘆已頃
奉行田令者倚法而逞爾制邑且受代乃能力抗其

鋒期以不擾畱遺所附民雖主計之臣請黜爾朕不
爾忘也五年之踦於今而復士所當爲不止此其益
厲所守以副朕意後吏部尚書趙以夫言其能拒括
田之令甘心受譴不以病民遷道州通判有美政朝
散大夫知廣德軍兼內勸農營田事賜魚袋致仕臨
終自爲墓誌甚詳年八十二子若鼎嘉興錄事叅軍
孫中孚直顯文閣

潘子曰莫志有大猷傳而子文附載科第表之下徐
志獨爲子文立傳揚挖備至而不及大猷意莫景周

去國初未遠見聞近真然其義例亦有可疑者及考張景人物志得理宗前後制詞溫厚誠摯淡於激勸其體臣之道至矣予故備錄之以見一時之異數焉

盛明遠

盛明遠太保文肅公度十一世孫也其先汴人度五世孫岫高宗朝爲宣義郎文英殿直建炎初扈蹕南渡通判平江府卜居吳江之儒林里後世遂以科第甲於邑中有名章者登淳熙十四年進士仕至吏部尚書從子文韶文昭先後舉進士爲大官自餘取科

名者不下十餘人最後明遠以咸淳六年領鄉薦爲廣州錄事判官宋亡隱居不仕元世祖聞其賢召判惠州明遠自以世受宋恩義不忍背遂辭不就詔書責迫乃變姓名從老氏以終

譚大年

譚大年字永壽八都人德祐中以薦爲湖州僉判詳載烏程志

元

甯居仁

甯居仁太尉玉之子也本河陽人玉從伯顏南下畱
戍長橋後以都元帥退老吳江贈魏國武宣公自居
仁以下遂爲吳江人居仁能修父業累官鎮國上將
軍廣東道宣慰使都元帥弟居正僉行宣政院事昌
言江南財賦司副使孫宗玉好書禮有儒者風幼侍
其父戍湖廣五開衛跋涉艱險父卒事母以孝聞總
兵知其賢命掌中潮千戶所書記剖決如流人皆稱
之

王原傑

子思忠

王原傑字子英其先四世祖扈蹕南渡葬邑之陳思邨因家焉世業儒至原傑益以學行知名於時元至正四年舉於鄉值兵亂不仕乃隱居授徒淡於性理之學爲詩文雅健高古學者尊爲貞白先生中書嬖子山稱其詩言近指遠發於寬閑寂寞而無月露風雲之態識者以爲知言所著有春秋讞議貞白英華文集水雲清嘯詩集皆嘗經進今列鄉賢祠子思忠亦有文學張士誠據吳屢召不至率義勇保障鄉里紀律嚴明若素習兵事者至正末王師東下徐相國

達頓師石里邨而單騎至城下諭降知州楊彝驚懣
不知所爲思忠謂曰中原淪沒且將百年復爲羣雄
割據生民之禍極矣今王師弔伐禍自此弭又有山
卵之勢奈何不歸附乎乃與彝率衆降相國嘉之賜
思忠旗章俾鎮守焉事平歸里思忠志存康濟不樂
仕進論者稱王氏父子文武異尚而並有高蹈之節
云

徐仁榮

徐仁榮字德剛秋澤邨人宋閣門宣贊舍人應勤之

子元至元二十一年辟授崇德州學正重建廟學擢翰林國史編修致仕徙居嘉興之新溪卒年六十

章德剛

章德剛柳胥邨人至正中薦爲崑山州學正有詩名子孫世居同里爲著姓

崔天德

子齡

崔天德字君誼七都人有幹才博涉書史仕元爲金玉局副使值世亂歸澤溪種竹自娛左丞周伯溫題其軒曰友竹一時名士如高啓輩皆有詩文子齡字

大年明洪武二十一年以人才徵拜刑部主事上疏
辭祿以清慎稱後坐黨禍卒於獄

潘子曰邑中文運之開始於紹聖政和間三魏相繼
以科名顯南渡以後綺川之莫儒林之盛號爲蟬聯
仕宦然莫志載盛氏登科者僅二三人而徐志據其
家牒增至五十六人論者譏其輕信至於事行之
詳亦莫得而述也惟盛明遠以宋之遺臣恥事二姓
藏跡方外斯可謂無忝家聲者矣

松陵文獻

獻集卷三

邑人潘樞章力田撰

人物志三

明

莫禮

張瑾李鼎徐衍馬達附

莫禮字士敬子文七世孫父諱字芝翁襟度倜儻國
初嘗召見叅大臣謀議每萬歲節與大姓葛氏沈氏
進貢稱壽太祖宴賚甚厚又嘗奉詔於京師營建費
鉅萬計洪武二十年禮以稅戶人才徵爲戶部員外

郎與同官沈玠等並奏辭祿洗手居職超擢右侍郎
轉左侍郎勾較簿書精解版法上甚嘉其能時新爲
政輕重未有準禮所守功歸於府者衡籍十三四嘗
云今所爲■後請寬焉卒不果二十六年藍黨事起
同邑顧學文等坐同謀詞連及禮與員外郎張瑾主
事李鼎崔齡徐衍等俱被誅臨刑賦詩有云一心忠
義堅如石惟有皇天后土知聞者傷之所著有東邨
詩稿北征集瑾字叔瑜以人材授工部員外郎與弟
荊州知府瑤俱坐黨死鼎亦以人材授禮部主事衍

字仲易以人材授工部主事又有馬達字伯行以人材授合水丞憂歸補昌邑丞爲政廉平人不敢干以私羶衣糲飯淡如也遷河間衛經歷卒於官

竇德遠

子昇

竇德遠四都克溪人洪武初以明經徵授禮部主客郎中擢本部侍郎致仕輯松陵志今不傳子昇亦以明經徵爲縣丞父子俱有文名

葛德昭

子芳

葛德昭二十九都人洪武中以人材授刑部員外郎

與同官十七人俱上章辭祿弟德潤與沈萬三連婚
姻是時四葛四沈名馳江左子芳徐志云字德春亦
犯父名恐誤

以人材授禮部員外郎後皆坐黨禍死

吳簡

子復頤

吳簡字仲廉桃墩人元至正中就鄉試不利遂杜門
力學吏嘗召之役簡被儒服執經往同役者皆目笑
之以薦授郡學訓導遷紹興路學錄洪武四年召至
京吏部試富民論簡請疏渠以通漑課粟多者第其
功賞上甚善之授崑山主簿以疾辭歸優遊林泉號

月潭居士年八十二卒簡爲詩文溫厚古雅善論語
不盡附程朱往往獨出所見所著有論語提要詩義
史學提綱守約齋集子復頤皆有文名復字孟修在
元季不仕嘗作感興詩閔元之亡爲時傳誦洪武中
以人材授湖廣僉事有雪區藁霞外集頤字希程幼
繼外家冒史姓以明經授本縣學訓導有桃溪集

曾日章

曾燿字日章以字行父朴浙西醫學提舉自杭遷吳
江家學宮之後日章博學有才智洪武十七年以貢

授黃陂知縣興學校課農桑政聲大著秩滿解官歸
三十五年以薦擢翰林院侍讀永樂元年與修永樂
大典未幾奉詔諭安南黎蒼語不遜日章折之具服
宣讀如禮二年使還陳黎氏篡立當伐狀四年四月
命從西平侯發雲南兵間道討之又造輕舟數百越
嶺嶠昇至富良江軍中文檄皆出其手賊平贊畫功
爲多五年還報復命往諭諸將至軍中以疾卒年六
十三子堅字孟堅由太僕寺典簿擢知開州入爲禮
部郎中歷四川雲南左布政使孫鑑知縣潘子曰分

省人物志以使交南贊師有功系於洪武間此本續
吳先賢贊之誤不知太祖時未有黎氏父子同惡相
濟之形而侍讀之擢在洪武三十五年卽靖難後事
耳今據實錄及王文靖墓碑訂正之

平思忠

平思忠初爲縣小吏事知縣蔣奎有相者來謁奎置
酒會僚屬令徧相之皆不甚許可顧見思忠執役庭
下目之曰此人官當至三品而不終奎大以爲妄其
後奎等皆坐事至或不得其死而思忠歷官叅政落

職以歸竟如相者言建文二年思忠以薦授禮部主事孫曹名臣錄云永樂中被薦授禮部主事諸書因之考莫志實以庚辰年授職蓋革除後記者諱之耳永樂三年進郎中時文皇帝方事招懷諸國貢者日至主客事殷思忠有精力事至立辦尚書呂震才之以事下獄適漠北貢使至他任主客者不稱職震因言思忠立出之復其官上以給事中楊弘爲陝西布政使弘陝西人也欲令清強有力者伺察之遂擢思忠陝西叅政嘗杖一推官其人誣以賊而是時法嚴思忠不敢辨坐謫戍北邊太監劉馬兒奉詔市馬

西域以思忠官主客多識遠賈請以自從詔釋其戍
給冠帶隨馬兒使吐蕃諸國而還後卒於家初知府
况鍾與思忠同起小吏官主客有交承之分鍾來蘇
州數延見思忠執禮甚恭方暑畱飲命二子執扇更
侍曰非無僕隸欲使兒輩知公爲我故人耳然思忠
居貧自守未嘗以事干鍾人尤多之性清簡善草書
家有清娛樓

莫志畧徐志稍詳今
本史鑑撰傳增定

劉鳳曰語稱使於四方宣其辭命招攜貳綏服之豈
易能乎燿再使交人其勤足紀思忠懷遠人致饗餼

其逆也以班有加等益虔使小大莫不得其所再紂終以復用豈非其才不可棄耶方是時綜核詳上下不敢苟若忠之進退亦文法所不得而裁之矣豈徒無害哉

何源

附孫昇

何源初名德源字幼澄同里鎮人從王文靖公汝玉受易洪武二十九年舉於鄉授德州學正

莫志作保德州考英

宗實錄源本傳授山東德州學正能以師道自任於

薦陞本州知州徐志亦同今從之

是州士始有取科第者以薦擢爲知州爲政廉明歲

旱鄰境多蝗源禱於神蝗不入境州人感之號曰賽
包家以母喪歸起爲梧州知府山水驟至漂廬舍民
多流亡衆議具奏請賑源曰若俟奏報民皆死矣乃
首捐已奉次勸民分廩賑濟所全活甚衆悉毀淫祠
禁競渡久而人不敢變尋以詿誤謫交趾英國公張
輔知其賢舉署交州學事多所造就士之以貢選至
方岳者十餘人後召爲吏部考功員外郎遷鄭府右
長史嘗繪欹器圖進之以盈滿爲戒王敬憚焉事聞
賜敕褒美予金幣復改文選郎中廉靜自持人不敢

干以私正統初擢江西右布政使會詔勾補遼東大
寧萬全諸衛軍甚急源上言南人弱不耐寒雖至其
地死亡必多不如簡其幼弱者三千餘人隸南昌衛
則水土相習訓練易加而朝廷亦得收其用報可民
甚便之三年入覲上愍其老子致仕歸自號東吳遺
老家無餘貲惟嗜好書籍年踰八十耳目聰明猶披
玩不倦子廷璧爲分次部居多至數千卷嘗一謁知
府况鍾服履敝陋門者呵之弗爲通源不得已自陳
官階乃大驚叩頭謝源不爲意旣見鍾談笑甚洽及

出府門肩輿不時至源自以爲部民乃徒步歸爲人
仁厚篤實訓子孫必依於忠孝臨終戒毋作佛事年
八十六其甥吳驥謂源雄才碩學忠厚謙和嗣續繁
昌皆陰德所致云孫昇字寅賓成化二年以貢爲曲
陽縣訓導能爲古詩文後進多從之遊旣致仕歸葺
源所居遺老堂題一室曰梅屋左圖右書檻外花木
掩映終日嘯傲客至則焚香瀹茗相對清譚雖貧未
嘗干謁年六十六卒無子

魏尚書驥志源墓云正統三年入覲上憫其老賜歸

又十六年卒而英宗實錄卽書源卒于四年十一月之下不知年月何以參差若是當以墓志爲信

潘子曰劉鳳言源用寬濟斥雖屢竟躋通顯以考終觀其所設施無異能碌碌不與物忤故自行間起得晉用非有所附麗然哉以余所聞乃不盡然源起行間得復用實以受知英公故無論源雅士非附麗人者而英公之賢亦非受人附麗者也江西通志稱源爲人溫雅歷事五朝文章政事見稱一時英宗實錄爲源立傳亦稱其在梧州賑饑之功及奏改遼東諸衛幼弱軍隸南昌衛甚爲民便詳源始終鳳之此論其亦少恕矣夫

黃珏 父份子著

黃珏字孟珏震澤人父份字原質永樂初舉秀才授
嶧縣教諭轉嶧縣卒官有詩名珏宣德中以文學才
行徵授溫州府經歷遷縉雲知縣有惠政以母喪去
任縉雲人送之哭聲載路

見溫州志莫旦乃
云轉武康誤也

尋起爲

廣東布政司經歷勾較文案以直道不合於叅政檄
往瓊州視事中嵐氣卒後五十餘年縉雲人有過邑
中者必問珏後何如且頌其遺愛云子著

著字誠夫性明爽少以氣節自高成化五年舉進士

授新昌令俗悍善訟鄰邑並苦其暴前令嘗爲民執
送京師著至苛察如神不少假借有請謁者輒集僚
吏見之如治公府事客皆慙懼不敢發而去民黠桀
者悉流之或規其太過著曰不如是亡以禁暴也由
是奸人不自容誣之臺司臺司素知著事竟白遷監
察御史巡按山西再按廣東芟除汙冗一時殆盡方
面以下有穢墨者輒望風解印綬去都御史王越屢
稱著才委以腹心有大政必召與議以母喪歸尋卒
著好舉淹滯而恩讎太明人多疾之

盛景

舊志畧今叅胡直撰傳及吳錄

盛景初作昶英宗改爲景字允高景泰二年進士

分省

人物志云天順間進士誤

授監察御史清山東馬政以災傷上疏

乞蠲民所負孳息從之四年出按廣東值黃蕭養亂後所在凋敝爲披荆榛立制度所下令寬簡不專用威而人畏之瀧水賊起景單騎至其營諭降之還朝言巡撫揭稽不法事失當事意會內苑以翠被飾餘艍張水嬉景偕同官爭之上怒命予杖景伏殿陛呼曰陛下聞古有殺諫臣者未聞以杖殺臣可耳無與

諸人上益怒久之竟叱出明日乃謫景古田典史天
順元年稍遷羅江知縣盜胡元昂作亂景傳檄解散
其黨遂捕得之不煩一兵德陽寇趙鐸僭稱趙王所
至屠剽攻成都覆官軍殺汪都司羅江故無城景令
引水繞負縣田洞開四門市肆各閉戶藏兵於內又
伏奇兵山隈約砲舉齊發陽遣迎賊賊入民家未半
景率死士開門舉砲兵突出遮擊賊首尾不相顧山
隈兵復至夾攻大敗之斬獲無數邑賴以完歲旱禱
之得雨景曰此非久計乃教民鑿池一千二百五十

餘所遂爲永利尋擢知叙州府會戎人琪筠高土佬
叛遣將征討景在行間前軍遇賊而敗景在後突之
矢著兩耳力戰不肯退賊忽驚亂我師乘之遂大克
獲上其功未報以創甚謝歸後追理前勞特遣使齎
璽書金幣賜於家景性友愛自叙州歸置第郡城與
兄弟居無間言又迎養姑姊之無依者襟度灑落詩
文高古忝頗以簡傲召毀亦終不能掩其大節云羅
江故無名宦祠景去後民肖像祀於羅真觀提學胡
直檄縣置祠且爲立傳

劉鳳曰景爲吏近苛然持法不貸能舉操彈至犯顏
色蒙捽詈摧辱猶抗言矯矯其氣不少暴已乎乃縣
道佐宣猶爲盡其力崎嶇谷壑山澤之間與士伍同
勞佚親介胄面夷不避奉職可謂無負若其馮氣而
驕荷已重而行上不休見笑於佞溺可謂苦矣而不
自知其失見畏于貪得而權竭於多取居復獲譏於
時庸亦才之過也乎

潘子曰世固有建言爲名高及一斥而弛然自放於
職業無所當者若景之折檻廷爭大義皦然不欺矣

乃能建功於遷謫之餘厲節於介冑之下自非丈夫
爲志窮益堅老益壯者能之乎而猶以簡傲不免於
喻訾之口甚矣豪傑之難爲也

范琮

本吳節撰神道碑

范琮

徐志作
宗非

字禎彥其先揚州人高祖淵字永澄輕

財奸施善吟咏元季避兵隱居同里鎮因家焉父德
字士能以長厚稱琮簡重寡言負才志宣德四年舉
於鄉以會試乙榜當授儒官自請卒業南京太學八
年成進士正統初授工部都水主事轉兵部武庫凡

九年遷南京吏部驗封郎中轉文選兩署堂事廉公

自守天順四年遷廣東左叅議

徐志作叅政誤

清軍政覈民

籍綜理有方奸宄屏息凡三年卒年六十五初琮遭喪家居歲大侵途有餓莩出米百石爲飢粥以哺飢民死不能斂病不能療者則給槥施藥人咸德之有許道師者以妖術聚衆剽掠鄉邨自長洲蔓延同里時巡檢以事出吏兵莫知所爲琮設方畧募丁壯擊之渠魁就禽餘皆溺水死且推功令吏兵受賞其才畧如是

梅倫

績吳先賢贊作枚姓案正統實錄書擢進士梅倫刑部主事則先賢贊誤也

梅倫字彥常尚湖人正統十三年進士十四年九月授刑部主事歷員外郎天順八年乞歸養居瓢溪倫久爲郎官雍容而已無躁競心時論賢之交章薦達成化初復起南刑部持法寬仁多所全活擢湖廣右叅議提調武當山兼理軍務職事旣簡益務清靜數引方士治道術者與修導引法遂無意仕進引年致仕生平廉介不愧古人年七十一自撰墓誌而卒劉鳳曰仕者之希慕貴榮急進取自非其情亦勢不

得不然其有度不任則讓能而處其下耳至無所謂而優遊卒歲久之不調此非怡然有廉靜無求之操烏能爾耶若倫者寬和有恒奉已約清於通塞之間無所繫吝稱可與立豈虛乎哉

馬忠

馬忠字克誠景泰二年以貢爲高州府通判時境內多事忠在戎馬間頗有勞績致仕歸進階奉議大夫有司舉行鄉飲禮忠在賓位者二十餘年弘治末卒年九十四

莫震

本莫旦續志參武昌志

莫震字霆威大猷十世孫正統四年進士知嘉魚縣

實錄正統五年十二月戊子擢進士莫震等十三人俱爲知縣爲人修潔謹於祀事

每秋冬巡行郊野修陂池橋梁爲民興利奏革五重

湖河泊所縣有白面山產佳石楚王請於朝遣使來

采碑公往來助役護衛軍爲暴者撻之而後具啓後

考滿朝王王致謝且命賜宴閩賊鄧茂七作亂上官

檄令率民壯出征震訓練有方若素習兵者在嘉魚

八年日與僚吏登山臨水飲酒賦詩有古循吏風景

泰二年入覲奉敕運糧於邊以父喪歸服除改知海鹽縣修捍海塘一百七十餘里爲一方保障禽土豪蕭文祥斃於獄民皆稱快遷建寧通判署邵武府事賜敕旌異遷延平府同知致仕歸家無餘貲葺先世綺川舊業居之足跡罕至城市年八十一無疾而卒震性樸雅所著有由菴集嘉魚志子旦自有傳

鈕文

本莫旦續志

鈕文字天章麻溪人其先有號月礪者元時謚清隱處士有名麟者能詩爲嘉興路達魯花赤楊維楨爲

之傳稱其寄征人繭諸詩宏壯振厲與唐人方軌並
馳云文天順三年舉於鄉知溫縣縣多屯軍與民雜
處淫暴不法文密謀於上官檄指揮沈鑑率民兵乘
夜掩捕悉置於法黃河流沙成地東西長七十里南
北八里皆溫地所塌而漲於鞏縣者兩邑爭種年久
不決文乃勘明悉歸之溫人考績居最尋以父喪去
起爲江西按察司經歷行抵邵伯湖大風覆舟死年
五十四爲人孝友忠信在官不攜家累惟一僮執役
以廉慎稱

莫昂 從子灝

莫昂字伯顒世居同里鎮祖子讓以高貲實京師遂爲宛平人景泰元年舉於鄉授袁州府同知聽政之暇與諸生講學成就爲多有奸民武斷鄉里訟者千數累歲不能決上官令昂治之立置於法又有劇盜僭號逐縣長吏出走昂承檄悉生致之居九年以疾歸課子弟讀書後進多執經問難姪岱幼孤育之如己子年五十三卒從子灝正統十二年舉順天府鄉薦第一景泰二年進士授行人卒爲人謹厚居貧苦

學

徐瑛

父眞

徐瑛字文玉父眞字宗正正統中以吏起家爲麗水縣丞在官十八年進階文林郎致仕眞職董銀鉞垂橐而歸人以是難之瑛家貧教授於鄉門生有餽粟者瑛以生學業未成辭不肯受景泰五年貢入太學成化中授泰寧知縣廉謹慈惠克修簠簋

二語出何喬遠閩書

專務以溫詞化民不尚刑罰有馴鳥巢其庭孕育而去久之乞歸泰寧人祀之學宮瑛自秋澤徙居城中

家益貧人有咎其居官不取者瑛曰不取吾職貧吾命也又可悔乎今列鄉賢祠

沈信

沈信字宗實其先長洲人徙吳江南郭永樂中爲縣吏正統初授柘城典史守已廉公不憚勞怨時屯田戍卒暴橫侵漁抗疏於朝力劾宿蠹上官器之攝縣事入覲賜敕戒諭以母喪歸尋卒邑人吳驥銘其墓

松陵文獻 獻集卷四

邑人潘樛章力田撰

人物志四

明

汝訥 父思聰子泰

汝訥字行敏黎里鎮人先世皆饒於財父思聰字彥明始爲吏德器溫雅恂恂如儒生永樂中授瀘溪巡簡禽巨盜胡志生等以功擢中城兵馬副指揮遷南京南城兵馬指揮於民所輸課鈔中得金鐲二訪其

主還之景泰元年致仕自號恩隱老人卒年七十六
訥少好儒術爲詩文格調平曠書法得晉人體而小
楷尤適美可愛景泰四年舉於鄉成化三年以善書
選爲中書舍人遷南京武選員外郎進郎中時王端
毅公恕爲尚書訥與同郡李應禎嘉興呂憲等竝以
文學爲恕賓客從容談論相得甚歡後訥出爲汀州
知府以憂歸服除會恕轉吏部選司承恕指問訥所
欲訥竟無言擬補南安恕以訥文士不便案牘欲更
之訥聞之曰官可擇耶恕乃聽之南安地瘠陜與嶺

表接壤商貨所委輸細民擔荷自傭裁給朝夕其勢
家則坐而居積依倚官府役屬小姓爲民患訥至皆
惴惴奉法無敢旁撓尋報罷人皆惜之訥有清操居
官三十年田廬不改於諸生時尤好獎成後進同邑
顧景祥家貧嚮學然性魯鈍教者多謝遣之訥獨悉
心指授景祥感奮卒成進士訥所著有學鳴集子泰
恭字元吉一字其通少有大志巋然老成之望未第
時與同郡李應禎吳寬同邑姚明史鑑竝以文學著
名所撰文章傳布遠近年五十始舉於鄉又七年而

成進士時弘治九年也授南京考功主事倪岳爲尚書素聞泰名一見喜甚久之遷驗封郎中時岳被召三山林瀚來代以泰有時望奏改考功泰甄別人物辭情竝協久之擢永州知府卒於官所著有來齋集

吳璠

從子鑒

吳璠字朝用爲人嚴毅有幹局景泰七年領鄉薦成化中授中書舍人嘗使韓王王享之嘉其無違禮贈以幣固辭不受居官十七年始遷工部營繕司員外董理神木六廠掌六營造舊以宦者主之諸奸猾多

窟其中部曹往往爲所鉗制璠獨挾摘徑竇令奸人
無所容有陳少監者亦稍自戢凡所隱占悉還之官
二十一年陝西大饑人相食命總督侍郎李衍賑之
廷議以爲河南偃師之東所謂孫家灣者卽隋唐之
洛口倉也故窖猶存宜畱漕米之未過淮者四十萬
石令從清河口往輸之移秦隴之民就食於彼而漕
舟不習河事往者多覆溺議選清強部臣往相水道
疏淺濬淤及徵沿河水手分布挽送使避河險遂命
璠與戶部郎中許楫同往已而河水淺濫漕舟遷延

數月猶不能達。潘建議曰：方今七月，瓜蒂水生，猶膠淺。若此秋高，氣寒，風水皆逆，舟益濡滯，延及嚴冬，愈不可行。此病一也。況秦民壯者已散，四方弱者饑困成疾，且顧戀老稚，豈能遠來？卽來而跋涉關隘，必多顛踣。此病二也。米積舟中，久不輪瀉，動移氣序，蒸浥侵盜，耗失必多。此病三也。夫救荒利速，今天時地利咸有所阻，當爲權宜以濟之。近來米商多從河南販陝西，故河南米亦翔貴。貧者苦之，今宜減價糶米，易銀賞往陝西，令彼自糶，免其往復之勞，利一販者賤。

糴貴糴坐獲厚利致米必多不煩勸督則陝西米價亦漸就平利二此既減價以糴河南貧民亦沾其賜利三漕舟既空運卒獲歸利四若堅守前策不知通變將恐公私俱困進退失據矣衆皆從之卽具疏聞

上以持論不一奪輯璠奉各二月

按史鑑輯狀止云詔可遠近稱便無

奪奉事考憲宗實錄書是年十二月停戶部郎中許輯等奉各二月初陝西告饑上命發漕運米四十萬石往賑行抵陝州時陝西漸熟而河南復饑議欲就河南賣銀往陝西糴米戶部爲上其事持論不一上責其處置乖謬令自陳至是尚書殷謙而下俱服罪詔釋謙等而罰其屬吏云觀此則賣米一事當時頗有異議而璠於通河漕疏中亦有周爰汴洛已歷十旬茫無寸效日夜憂惶將歸罪司寇之語蓋事雖得

請猶被徵譴行
狀特諱之耳

先是李衍上言漢唐都關中自河入
渭竝通舟楫漕運轉輸以給京師遺跡俱在但三門
集津河水悍急請令相度疏鑿以通轉運上併以責
璠璠躬自案視考隋唐轉漕遺跡上疏力陳其不可
行事得已明年監抽蕪湖竹木踰歲代還卒於京師
從子鑒

鑒字汝礪少逸越不羈好學工詩格律高古與趙寬
齊名與人交不立崖岸居官以清謹稱成化十三年
舉於鄉巡撫王恕聞其名召與語鑒極陳民間利弊

附以經史娓娓不休恕甚異之贈鋈詩期以大用鋈復以詩諷恕益器重之二十三年成進士授兵部武選司主事進員外郎尋遷武庫司郎中卒初鋈拜官當得文選會恕爲吏部尚書同年楊生者欲奪之乃言鋈先事受賀恕聞不得已改鋈武選而以楊生代之後恕數召見鋈鋈終不言恕始悟受欺欲調鋈不果而去其恬退如此嘗遣治大臣葬道聞母訃遂委事徑歸當事者難之鋈曰安有舍親之喪而勤人之喪者乎鋈善書法所著有懶溪集亡子

葉紳

孫可成

葉紳字廷縉其先居洞庭東山有德潤者洪武中以人材徵授陝西布政司理問後徙汾湖爲大族紳性質雅登成化二十三年進士弘治改元以老成選爲戶科給事中以母喪歸三年補吏科八年遷禮科右給事明年轉左上疏請諭教太子又陳修省八事皆切治要上頗采納署科務謹重稱職不事中傷人稱爲長者十一年遷尚寶司少卿卒於官初弘治七年吳中大水民饑紳奉使閩浙過家因上言國家糧餉

率仰給東南而頃者蘇松常杭嘉湖諸郡水道湮塞甚爲農事之患乞命官往治之於是遣工部侍郎徐貫往經理其事人咸德焉孫可成字懋學嘉靖二十四年進士知山陰縣有廉直聲胡宗憲開府辦倭知可成才畱之幕府令叅謀畫凡兵食調度攻守形勢皆從中贊決動中機宜吾邑盛墩之捷敵樓之築可成有力焉宗憲性剛有得失軍吏莫敢爭可成善爲調護多所補救嘗有裨將四人失律當斬可成請赦其死責後效卒皆立奇功云以薦擢南京工部主事

謫蒲州同知有嫠婦私於僧誣其子以逆可成佯坐子死令婦具棺及伺具棺者僧也遂納僧於棺生埋之而釋其子人咸快之尋免歸卒

吳洪

子山巖

吳洪字禹疇父璋見孝義傳中洪年十二爲縣諸生動必循禮訓導江晟待諸生過嚴諸生將訴之督學御史洪曰弟子叛師猶子叛父也不可卒不署名事遂已舉成化十二年進士授南京刑部主事累進郎中擢貴州按察副使以喪歸尋起廣東巡視海道弘

治十二年進福建按察使又二年入爲太僕卿又四年擢工部右侍郎督易州厰正德元年轉左侍郎理部事四年拜南京刑部尚書又二年致仕洪有廉節起家刑曹精於法比多所平反在廣東以海道兼攝鹽政皆號利藪洪獨無所染御下不少假貸宿弊頓革御史王哲欲葺諸公署而難其費洪建議以爲鹽法引納官錢若干獲利數倍願爲權豪所專請均之於商使輸值佐役便從之鎮守中官初役四水驛舟各一久乃令輸金後又并徵其舟御史汪宗器銳意

華之洪請釐正自今日始勿追所得金於是中官帖服徭人數爲暴官軍往往濫殺要賞遣廷臣往按之悉以委洪廉得其狀捕誅首惡而慰撫其餘邊患遂息在福建城北常有虎患洪爲文禱告虎竟去建寧延平大水民貧且互劫輒便宜賑貸汀漳軍餉缺盜賊蠭起取征商之羨賑之士徭戍者有所索守臣集三司議洪曰不與則致叛與之則爲例不若以賞爲名而姑與之衆皆稱善在工部當劉瑾用事怨劉大夏誣以罪欲殺之下大臣議惟洪與都御史屠應埈

力辨之乃得解徙南京刑部有寧河王鄧愈之後與其弟爭賜田者恃瑾爲援洪執法不阿瑾大怒勒令致仕洪曰吾志也遂歸凡十三年卒年七十八贈太子少保何喬遠閩書曰洪爲人和而不侈莊而不倨在官聽訟以情數辨疑獄布政司吏有微罪鎮守中官銜其使欲重罪吏以爲使累洪厲聲曰殺人媚人吾不爲也子四人其三竝登進士長山次巖幼崑崑字美之仕終嚴州知府

山字靜之正德三年與弟巖同舉進士除刑部主事

累進郎中抗直無私九年不遷官嘗錄囚江西平反
疑獄以百計武宗將南巡山偕同官上章諫詔跪殿
廷五日杖三十久之擢山東按察副使理驛傳軍務
剷除積弊方暑月諸司多所逮繫山量輕重出之無
滯囚時有湮井自渫民歌頌之遷陝西右叅政嘉靖
二年改浙江以父洪卒不赴五年起爲福建按察使
福建故洪治所山聽斷公明法中行恩吏民思洪美
山復歌頌之居二年遷江西布政使所至以廉靖長
厚有士大夫聲又二年擢副都御史巡撫河南以汴

苦河患乃根極利害著治河通考十卷初河南糧兌小灘民弗便武宗時移臨清又弗便山建議移回隆運官受臨清賄爲浮言山力持之遂爲定制伊王素柔懦宦豎縱恣臨漳府有將軍祐棧者招納亡命剽民財所至人皆罷市山具以聞請薄責王俾自新而免祐棧爲庶人祐棧乃潛走京師誣山罪左降浙江叅議稍遷徙江西叅政尋擢應天府丞十五年以僉都御史巡撫四川明年晉右副都御史提督南贛治尚清簡未幾召爲刑部左侍郎十九年進尚書時翊

國公郭勛以議大禮得幸驕僭不法爲言者所劾下
廷臣議皆觀望持兩端山獨陳其罪狀論棄市諸黨
附者以次具獄上內惜勛爲持其奏不下勛竟瘐死
獄中會當秋報上怒責山論讞後期免其官山卽日
僦小車角巾就道發疾卒於利國監驛年七十三山
倜儻魁梧聲如巨鐘性孝友與諸弟析居自取敝廬
朽物而已與人語洞見底裏不設城府歲飢嘗折逋
券萬石以爲賑鄉人德之隆慶初詔復官贈太子少
保弘光元年禮部請賜諡不果今列郡學鄉賢祠

巖字瞻之初爲行人遷工科給事中遼東屬國詣闕
下訴其使者被殺巖奉詔馳至遼廉其實還言邊吏
貪首功不治將生邊釁遂抵邊吏罪諸部悅服正德
九年乾清宮災詔求直言巖條上視朝講學建儲及
斥養子番僧罷邊兵中市凡數十事言甚切至十三
年遣諸部使者四出督民逋負併及已蠲除者巖請
召還又乞遣大臣治東南水利先墾白茆故道引太
湖水注之海上從其言久之遷四川叅政專理糧儲
尋奉表入賀道卒

王世貞贊洪像曰嗟于公一法吏子繼之復廷尉民
不寃用長世司寇吳考及嗣始爲郎旋正位慶之餘
衍來裔贊山像曰公之用法終始在寬及其究也以
法失官雖則失官其道乃完白帖單練以附桐棺天
王聖明還司寇寇

潘子曰徐志不爲洪立傳余嘗疑之豈以其父子榮
顯故抑之耶余先王母及繼母皆吳氏故得備聞其
遺事大約篤厚如萬石君明允如于決曹實有餘而
文不足者也又覩王公世貞家所藏名賢像洪白哲

而麗山狀貌魁傑竝有閭閻侃侃之容余益以想見其爲人世貞之贊蓋不虛矣其累世鼎盛科名甲於郡中有以也

王哲

王哲字思德志行剛果有幹局十三爲諸生督學浮梁戴珊以國士期之弘治三年登進士授監察御史福建清軍兼理鹽法時有以同姓被誣爲戍卒者百餘家淹繫累年一訊卽出之十年巡按廣東南海十三邨負固數爲亂鎮巡議屠之哲曰邨戶不下萬餘

玉石俱焚吾不忍也乃率廣州知府輕騎詣其巢諭以禍福許自新皆感泣解散又每邨立土里長以約束之卒以無事十二年上言凡有罪遷口外爲民者跋涉萬里風土不宜往往疾病道死是以家人聚哭如赴西市請自後兩廣及雲南貴州四川福建應遷口外者悉發近衛爲軍下所司議行之遭父喪去官十五年再按江西鎮守太監董讓怙勢驕縱至匿盜賊不以聞哲首劾其不法事上切責讓且以治盜事付哲哲嚴督有司遂禽渠魁賜敕獎諭時天旱種不

入土哲親錄繫囚平反數百人翼日雨是秋遂稔又
善斷疑獄有大姓被盜誣其怨家賂鎮守欲寘之法
哲察其寃釋之鎮守怒衆亦以爲疑後眞盜出衆皆
服民間爲之謠曰江西有一哲六月飛霜雪天下有
十哲太平無休歇十六年遷山東按察司副使臨清
兵備有貢夷私市鹽哲請沒入之而給其直人稱得
柔遠體正德三年進廣東按察使明年擢南京右僉
都御史理操江事會江西盜起奉敕巡視南贛汀漳
斥貪吏去苛政盜聞皆斂跡尋改巡撫以病乞歸正

德八年卒年五十七居家孝友卒之日貧無以殮子孫至不能自存人以此服其廉初豐城諸生雷禮有墓地爲勢家所奪訴之有司俱不敢問及哲至親鞠得其狀時勢家已葬哲竟令徙之而還其地禮後貴顯思哲之德爲具疏復廕其曾孫某官至兩浙鹽運使何喬遠曰哲善讀書尤熟於史嘗言說好話行好事作好人題所居曰好齋有好齋集十卷曾孫有功字可大萬曆十一年進士授遂昌知縣興學校平役法宿弊一清十六年兩浙大侵米價踊貴獨還

昌以賑救有法多所全濟擢廣西道御史先後條上
訓儲親朝恤刑諸疏皆切時務遣視陝西茶馬時西
邊未靖經畧鄭雅詭奏邊寇東歸有功上疏發其奸
欺因陳九邊利害甚晰雅震恐卽日促寇去西陲以
安寧夏叛魏學會葉夢熊先後討賊多用其計謀尋
改巡按廣東粵中素饒宦游者多自潤有功一切禁
絕黜貪吏鋤豪橫尤畱心庶獄所活以千計性節儉
卽與督撫宴會不過五六簋雜以腐菜而已還朝值
上以軍政事遷怒謫臺省一時相顧莫敢救有功獨

上疏爭之未下會司禮太監田義有所求不應遂乘間中之與諸臣俱削籍卒天啓四年二月詔贈太常寺少卿有功孝友廉讓歷官雖久貲不加益而親黨待以舉火者甚衆人以爲不愧其先云

潘子曰實錄稱哲爲御史頗有風裁後撫江西時逆藩宸濠常以計去守臣不附已者哲自濠所宴飲歸而病或謂濠中以毒云而徐志稱宸濠畏憚投以鴆毒幸不死遂以疾乞歸踰年卒墓誌則謂其病實以憂勞所致考哲去官在正德六年而卒於八年九月

則憂勞成疾之說果信耶余近從其家得其從孫鼎
所記遺事云宸濠欲結婚於公公潛窺其有不軌志
遂力拒之是歲夏杪宸濠宴諸督撫密置孔雀毒血
於瓜上進公食之少頃煩懣口不能言至自投於井
幸羣僚立救厯免殞耳上閔其忠令馳檄還鄉而究
以毒發終悲哉然則中毒之事通國皆知之而墓誌
作於宸濠未敗時故曲諱之耳誌又言公在江西有
都司以賊革者福建林公俊來巡視復用之公不可
俊怒移文語侵公公不以介意諭三司曰林公先朝

名臣處斷必不苟蓋偶未詳耳令再具事本末以請
俊大悔悟卽罷弗用因重愛公比歸賦詩贈別送之
數程噫公之爲人豈特疆直自遂而已哉

沈漢

沈漢字宗海正德十五年舉於禮部明年世宗入立
策賜進士授刑科給事中中官馬俊王堂白南京召
至漢曰人君初政當慎刑賞重命令宦豎旣斥而復
進端不可開竟論罷之嘉靖改元詔蠲四方逋稅漢
言逋稅半出侵漁若例免之則猾者生心請差別其

等以惠良民又言近日籍沒之貲不下數千萬請悉發以補歲入之不足上皆嘉納會南京風雷之變京師地震乃援漢五行志反覆數千言指切時弊其他言錦衣不當典刑林俊不當去位皆政體之大者五年進右給事中明年遷戶科左給事中李福達獄起詞連武定侯郭勛營庇甚力法司顏頤壽等反坐下獄漢上言祖宗之法不可壞權幸之漸不可長國之大臣不可辱賊之妖妄不可赦於是權幸惡之坐罷歸歸二十年卒隆慶初贈太常寺少卿

陸金

陸金字德如石里邨人正德十二年進士歷工部郎

中出知漳州府初至計禽妖賊有惠政士民刻石頌

之嘉靖十三年遷江西按察司副使徐志云仕至後福建副使誤

家居貧甚足占守矣二語本閩書所著有石里詩集

何遵本舒芬梓溪集王鑒附

何遵字孟循其先邑人洪武中以閭右徙南京遂隸

籍江寧遵家貧父命之賈心厭之去爲儒或言祿命

不利遵笑曰儒固有利不利耶爲諸生因學師策問

范滂母事感之歸告母曰兒設爲滂大人能爲滂母
乎母笑而許之正德九年舉進士吏部尚書陸完聞
其名使子弟師之會選臺諫獨引疾弗出曰吾不可
資人以進也尋授工部主事榷木荆南下令商白百
金下減三之一風水敗貲勿算入算者手實其數自
識之藏於郡帑數日一會所入比去遵不私一錢十
四年三月武宗將南巡郎中黃輦等疏諫下獄江彬
揚言輦旦夕且死欲以喝止言者而遵已前上疏言
淫祀無補敗亂且宗藩中有潛謀不軌者其兆已見

矣彬畏事泄遏弗進至是復與林大輅蔣山卿上疏
極言彬怙權倡亂輦等無罪願特賜寬宥毋使後世
有殺諫臣名已受杖肢體盡裂越二日竟卒始遵草
疏時家童前抱遵哭曰主縱不自計奈親老子幼何
遵從容語曰毋多言歸爲我謝大人勿令兒子廢學
足矣遵死之日父聞工部郎有以言獲罪者卽長號
曰遵死矣夫已而果然世宗卽位贈尚寶卿弘光中
謚忠節同時杖死者有王鑾字汝和其先亦邑人洪
武中隸籍錦衣衛正德中舉進士時流賊甫平郡縣

瘡痍未復鑾作原治二篇大略謂今之賊盜皆由守令監司惟利是視撫按又樂其趨承罔覈實效以致浸淫潰敗故弭盜之本在禁奢立禮敦教懲貪而已吏部尚書楊一清異之補文選司主事持正不妄交遷考功員外郎朝退扃自防人罕見其面晉驗封郎中與同官張衍瑞等合疏諫南巡被杖創甚寢疾踰年卒